

Siunnersuut uunga: Naalackersuisunut ilaasortat akisussaanerat pillugu inatsisartut inatsisaata allanngortinnera pillugu Inatsisartut inatsisaat nr. xx, xx 2011-imeersoq.
(Inatsisartuni ilaasortaq Niels Thomsen, Demokraatit)

Akissuteqaat

(Naalackersuisunut siulittaasoq)

Siullermeerneqarnera

Naalackersuisut aallarniutigalugu siunnersuuteqarnermut qujavugut.

Soorlu siunnersuuteqartup saqqumiussissummini nalunaarutigigaa Kalaallit Nunaanni Namminersorlutik Oqartussat pillugit inatsisip ulloq 21. juni 2009-mi atuutilerneranut atatillugu ilaatigut nunatsinni inatsisartoqarnermut naalackersuisoqarnermullu taaguutinik nutaanik eqqussisoqarpoq.

Namminersorneq pillugu inatsisip atuutilernerata kingorna inatsisip atorneqartup allanngortinneranut atatillugu Naalackersuisut isumagisimavaat inatsisit kingunerisaannik allanngortitassanik pisariaqartinneqartunik ilanngussisoqassasoq inatsimmi aalajangersakkat namminersorneq pillugu inatsimmi oqaatsinut atorneqartunut naapertuuttunngortinnissaat anguniarlugu.

Taamaattorli Naalackersuisut – pingaartumik nukissat pissutigalugit – inatsisit kingunerisaannik allanngortitassat aatsaat allanngortittarniarlugit qinersimavaat inatsisip allanngortinnissaa pisariaqartillugu. Periuseq tamanna aamma nunani allani nalinginnaavoq suliffeqarfiit assigisaallu nutaanik taaguusersornerinut/atserneqarnerinut atatillugu inatsisinik iluarsisoqassatillugu.

Kalaallit Nunaannut pinerluttulerinermi inatsisip nutaap atuutilernerani “Immikkoortoq siulleq” “Immikkoortoq I”-imut allanngortinneqarpoq aammalu atorfirmik sumiginnaaneq pillugu § 30 nummer 55-inngortinneqarluni, imarisaat allanngortinngikkaluarlugit.

Kalaallit Nunaannut eqqartuussisarnermik inatsisip nutaap atuutilerneratigut § 749-mi aalajangerneqarpoq suliat siornatigut Kalaallit Nunaanni Eqqartuussisuuneqarfimmi siullermeeriffiusumik suliarineqartussaasut inatsisip atuutilerneratigut Kalaallit Nunaanni Eqqartuussivimmut siullermeeriffiusutut tunniunneqartassasut.

Siunnersuut nalunaarutigineqartutut eqqartuussisarnermi allannguuteqartitsinermik kinguneqassanngilaq, tamannalu allanngortussaananani siunnersuutigineqartutut allannguuteqartoqaraluarpat imaluunniit allannguuteqanngikkaluarpat. Taamaattorli Naalackersuisut isumaqarput siunnersuuteqartoq ajunngitsumik suliniummik takutitsisuusoq siunnersuummullu isumaqataallutik.